

業因名斯亭曰述賢考其陣法則方以八環一而爲九馬隆遵之以破賊圍以六包一而爲七李靖遵之以平虜蓋戰守處畫部伍節制所重者勝所忽者敗所以觀宏規者仰服指奇蹤者稱美也且益州分應井絡僻在坤維而武侯以區區之蜀莅政至公董武立信貫許國之精誠伸命世之勇略合施竹帛不續而溫律嚴斧鉞不寒而慄方其鷹揚上國虎視中原驍將聞風而奪心壯士望塵而破膽擁精銳之眾者堅壁受辱稱骨鯁之臣者仗節包羞玩敵於股掌之上措勝於談笑之間比昔賢則過之責斯人而備矣余構亭於此俾其登之者識常山蛇勢知天下奇才壯雄圖之不朽想英風而猶在嗚呼天假其年則禮

道藏輯要

忠武侯集  
賦

六

星集五  
卷之十一

樂攸興天命有歸則智力無用大筆方籌長星遽墜陵谷已遷尙有典刑蠻戎雖化不忘武備況今夏賊干常遂竊位號晉豫遺民阻聲教之施漢唐故地睽正朔之奉而受鉞登壇專長城之寄者節制可忽耶秘殿筆閣當方面之權者勤勞可繼耶今步遊灘上鑒前追往作古賦以述其始終使夔人歲時歌之無感慨焉雖然孔明方躬耕之時處布衣之賤倘不遇三顧之主安能縱七擒之酋噫自古英雄之士時命不遇其名湮滅而無聞者惜哉賦曰

鼎分率土姦賊陸梁孔明布石於平沙之上高步於大江之傍志馳許洛欲掃荆揚按井字九宮之法本河圖八卦之詳縱橫

魚貫曲折雁行雖云蛇勢實曰龍驤其始也荷寫誠於傾蓋遂  
感激而褰裳應雲龍之隱隱信魚水之洋洋其終也酬三顧而  
不爽縱七擒之所長資一時之談笑播千載而芬芳况夫才兼  
管樂政黜申商蜀則冬日魏則秋霜蜀民暖於布帛魏人困於  
豺狼於是并聲東下響應西方折曹氏之牙角挫仲達之鋒鋌  
至今秦隴恥其巾幗梁益詠乎甘棠論高節則勝棲岩之入夢  
鄙負鼎之干湯推治體則蕭何爲政之咳唾子產遺愛之粃糠  
量行事則用兵如晉文之示信教民如周誥之成章觀施設則  
肩輿羽扇以節金鼓木牛流馬以代梯航遵節制則馬隆以八  
陣用於晉李靖以六花顯於唐宜其斬王雙而走郭淮殺張郃  
道藏輯要

忠武侯集

九

星集五

而辱宣王吁哉飲渭之龍隨天數而已沒吞吳之蛇如寶氣而  
難藏所以餘威遠振遺跡尤彰忠義撫劍而嘆息英雄沾襟而  
感傷戎蠻懷德而縞素士民追昔而蒸嘗余徘徊灘上不見鵝  
鶴奕奕龜蛇央央但覺雙魂失宅三甲負芒瞿唐風急起波聲  
之嗚咽巫峽雨散連天際以淒涼縱使秦雲變色魯日迴光竟  
與草木同朽皆無益於興亡宣和二年十月十五日魏陵閻苑  
述

### 八陣圖賦

楊維禎

遐哉邈乎蠶聚故墟劍閣崢嶸兮石棧縈紆車不得而運兮馬  
不得以驅非王業之所基兮徒抗險乎中都帝中山之苗裔兮